



EDITORIAL

Makiusa ha ungara han mga trabahador pankalibsugan, idemanda an medikal ngan siyentipiko nga solusyon ha pandemya

Ha butnga han waray wantas nga pagdamo han kaso han COVID-19, inutil nga pagresponde han rehimen Duterte hini ngan naruruba nga pampubliko nga sistema pankalibsugan, ginkalampag hini nga naglabay han mga trabahador pankalibsugan an gubyrno para ha kadagmitan nga pag-ayuda ngan mas desisibo nga aksyon kontra ha krisis.

Ini an ungara han mga trabahador han sektor pankalibsugan nga lima kabulan na nga gin-aantos an krisis ha pampubliko nga kalibsugan. Ginsalo nira an usa nga piay ngan dunot nga sistema, diin an mga hadto na nagsasalwak nga mga ospital gindumog han mga pasyente han COVID-19. Sobrasobra na an ira pagtrabaho ha butnga han kawarayan han higamit pamproteksyon ngan makuri ngan diri makatawo nga kundisyon ha lugar han pagtrabaho. Kulang kaupay an ira nakukuha nga suhol ngan kumpensasyon para ha kadelikaduhan nga ira ginsungsungong. Damo ha ira an nagkasakit na ngan namatay.

Grabe na an kabido ngan kangalas han mga trabahador pankalibsugan ha mga ginhihimo han gubyrno. Amo ini an pamatuod nga pakyas an rehimen Duterte nga atuhan an pandemya. Nagpapakabungol-bungol ini ha maaringasa ngan natikahiluag nga panawagan han magkalain-lain nga sektor nga tanggalon an mga heneral ngan upisyal militar ha pangunguna han pagresponde ha pandemya, ngan ipatuman an haum nga solusyon medikal sugad han hiluagan nga pagtesting. Kundi, gindakop hini an gatos kayukot nga nagtala-pas ha lockdown, bisan diri hini hul-os nga napupugnan an pagsamwak han sakit. Ginbastos, gin-insulto ngan gintarhug ni Duterte an mga trabahador pankalibsugan nga adlaw-adlaw niya ginpapakurian tungod ha kalugaringon niya nga kahambungan ngan katig-ahan han ulo. Agud tahuban an iya kapakyasan, ginsasaad niya an usa nga bakuna nga pira katuig pa an malabay antes magamit han mga tawo. Samtang naghuhulat hiya han milagro, gin-gamit niya an pandemya agud labaw nga

"Makiusa...", sundan ha paypay 2

6 nga tropa, kaswalti han AFP kontra ha BHB-Northern Samar

DUHA NGA SUNDALO an patay samtang upat an samaran ha mga elemento han Armed Forces of the Philippines kahuman an mga aksyon militar han Bagong Hukbong Bayan-Northern Samar (Rodante Urtal Command o RUC).

Duha nga sundalo an napatay ha operasyon haras han usa nga tim han BHB-RUC kontra ha mga tropa han AFP ha Brgy. Lourdes, Las Navas hadton Hunyo 28.

Samaran naman an duha nga sundalo ha aktibo nga pagdependa han BHB-RUC kontra ha mga elemento han AFP ha Brgy. Rizal, Las Navas hadton Hulyo 4. Kahuman an aksyon militar, naglinibot an usa nga helikopter han kaaway agud kuhaon an ginbabana-bana nga usa nga sundalo nga napatay ha aksyon militar.

Hadton Hulyo 16, nasamaran an duha nga elemento han CAFGU nga nakigbalyuay han buto ha mga Pula nga mangaraway han BHB-RUC. **L**

20th IB, utro nga nangistraping han mga sibilyan

USA NA LIWAT nga pamilya ha Palapag, Northern Samar an nagin biktima han pangistraping han berdugo nga 20th Infantry Battalion-Philippine Army ilarum ni Lt. Col. Juan Gullem.

Gin-istraping han mga elemento han CAFGU ilarum han kumand han 20th IB an pamilya han parag-uma nga hi Albert Durin ha ira balay ha Barangay Natawo hadton Hulyo 26. Namatay hi Albert ngan an iya asawa nga hi Maritess, samtang nasa-

"20th IB...", sundan ha paypay 2

"Makiusa...", *sundan ha paypay 2*

kontrolon an gios han populasyon ngan hampakon han pasista nga atake an ngatanan nga natipa ha iya rehimen.

An ungara han mga trabahador pankalibugan usa nga panawagan para ha haum nga kumprehensibo nga medikal ngan siyentipiko nga solusyon. Naangay la nga makiusa an katawhan hini nga panawagan. Kinahanglan nira ig-insister an demilitarisasyon han pagresponde ha COVID-19. Ig-insister nga himuon han gubyrno an napamatud-an na ha iba nga nasud nga hiluagan nga pagtesting, ginpauswag nga sistema han monitoring, dugang nga pondo ha mga pampubliko nga ospital, ngan agresibo nga pag-empleyo ngan sadang nga suhol para ha mga trabahador pankalibugan. Kinahanglan ipanawagan nga patalsikon na ha pwesto hi Duterte agud ihagudalan an usa nga tinuod nga makamasa ngan siyentipiko nga sistema nga pankalibugan nga magse-serbe ha katawhan. ■

"20th IB...", *sundan ha paypay 2*

maran naman an singko anyos nira nga apo.

Hadton Hunyo, ginmasaker han mga sundalo han 20th IB ngan pwera han kapulisan an pamilya ni Zaldy Meraya ha Barangay Bagacay, diin namatay hira Meraya ngan an iya bayaw ngan grabe nga nasamaran an iya asawa ngan mga anak.

Samtang, maabot ha 192 nga indibiwal an napiritan nga mag-ebakwet tikang ha mga baryo nga gin-ooperasyon han mga pwera han Retooled Community Support Program han 20th IB ha Las Navas, Northern Samar. Nagkagikan an mga residente kahuman maglibot an mga sundalo ha pamumuno ni 1st Lt. Daniel Sumawang agud hadson ngan hadlukon hira nga sumu-render komo kaapi han BHB. Upat nga barangay kagawad liwat an ira ginpirit nga pumartisipar ha ira operasyon kombat, ngan kun dumiri hira aakusaran hira nga kaapi han BHB. ■

Susrunod nga pangabuso han 8th ID ha San Jose de Buan

INABOT HA SINGKWENTA nga indibidwal an napiritan nga mag-ebakwet tikang ha Sitio Salvacion, Barangay San Nicolas, San Jose de Buan, Western Samar ka-human an susrunod nga pangabuso han 8th Infantry Division-Philippine Army hini nga Hulyo.

Hadton Hulyo 29, 24 kabises nga ginpabuthan han 8th ID han *mortar* an mga umhanan hirani ha sityo. Ika-duha na ini nga panganganyon ha nasing ngan bungto nga nagdurot han dako nga peligro ha mga residente nga nakadto ha lugar agud mag-uma, manmusil han hayop ngan mag-uway.

Antes ini, gindakop ngan iligal nga gin-aresto han 54 nga tropa han 87th Infantry Battalion an parag-uma nga hi David Dacles samtang tipauli ini ngadto ha sityo hadton Hulyo 25. Gindara hiya han mga sundalo ha hedkwarters han batalyon ha bungto para ha interogasyon. Ginbalhin na-

man hiya ha usa pa nga kampo han militar ha Brgy. Cantato, Paranas agud utro nga iinterogar. Tubtub yana katin pa gihapon hiya han mga sundalo.

Pira na nga kapitan han barangay ha San Jose de Buan an ginreklamo an mga mapangabuso nga sundalo tikang han magtikang an hiluagan ngan suso nga operasyon kombat han 8th ID ha San Jose de Buan ngan mga karanit nga bungto hadton katapusan han Mayo. Ginpipirit hira nga makig-kooperar ha mga panmilitar nga operasyon ngan tatahapan hira nga kaapi han BHB kun dumiri hira. ■

22 nga kaapi han BOP, nakahaman han BKP

LUYO HAN DIRUDIRETSO nga operasyon kombat han militar ha isla han Samar, inabot ha 22 nga kaapi han batakan nga organisasyon han Partido (BOP) ha baryo ngan komite han Partido ha seksyon an nakahaman han batakan nga kurso han Partido (BKP) hini nga Hunyo.

Ginpangunahan han prente komite an duha kabulan nga pag-aradman ngan ginhimo ini hin usa tubtub tulo kabises kada semana. Duha an prinsipal nga instruktur han kurso ngan upat an nabulig ha paghatag han pira nga topiko. Ginhimo an kurso nga *staggered* o tilad-tilad tungod ha sitwasyon militar diin diri akos an tag-iha nga mga konsentrado nga aktibidad.

Ginhihimo an pag-aradman kada alas-6 tubtub alas-9 han gab-i ha mga balay ngan eskoylahan ha baryo gindumara an kurso agud diri makurian an mga estudyante nga tumabong. Agud magin manilampuson ini, ginpahinumduman an mga estudyante

nga temprano mangiklop.

Sigon kan Ka Gary, kaapi han prente komite ngan usa ha mga instruktur han kurso, kaparte ini han buruhaton konsolidasyon hini nga seksyon agud klaruhon an mga batakan nga prinsipyo komo mga kaapi han Partido nga makakabulig ha pamumuno han mga estudyante ha kada nira baryo. Pinaagi hini, nagagamot an mga internal nga problema ha pamunuan sugad liwat ha giutan han mga taghimaryo. ■

